



古今事文類聚

遺集  
五之三

~~99~~  
~~95~~

逍遙文庫  
文庫 6  
28  
95





新編古今事文類聚遺集卷之五

建安 祝淵 宗禮 編

金陵 唐富春 子和 刊

國史院部遺

提舉實錄院

編修實錄附

此下補新集史院史官之後

**歷代沿革**

治平元年以宰臣韓琦提舉修仁宗實錄熙寧元年


以宰臣曾公亮提舉修英宗實錄後該准此見會要續會要

紹興初實錄國史皆寓史館後罷史館遇修實錄即置實錄

院遇修國史即置國史院九年二月以修神宗哲宗徽宗實

錄始置院以宰臣一員提舉修撰檢討官無定員檢討官以

事文類聚遺集





本省官或他官兼而修撰官如史館例詔將史館前廳元寶錄院作角門通過史館併秘書省十二年詔史館提舉諸司承受等并官吏並併歸實錄院以罷史館也中興會要

古今事實

世謂董狐

唐吳兢與劉子元撰定武后實錄叙張昌宗誘張說誣魏元忠事頗言說已然可賴宋璟等激勵苦切故轉禍為忠後說讀之知兢所為屢以精斬改辭曰徇公之情何名實錄卒不改世謂今董狐本傳

聖朝大典

至德二年史館太常少卿于休烈奏國史實錄聖朝大典續通典

訪求事迹

李益能撰慕容禮行狀重修神宗哲宗兩朝正史公奏神宗實錄墨本元祐所修已是成書宋本蔡卞重修多所增損而元祐史官語言無不遺失實乞將宋墨本參照修定哲宗實錄蔡京提舉編修多是增飾語言變易是非殆非實錄之體乞於舊臣之家訪求當時文字事迹參照上悉如所請宋會要

古今文集

雜著

辭免升同修國史實錄院同修撰奏狀 周必大殊渥薦加危衷增厲伏念臣本疎文藝尤乏史才攝事玉堂已慙於舊直計員金鎖更假於新榮名稽叙進之規實溢同升之



數昔劉子先居秘書而領史事自矜又處於載言質知章遷儀曹而兼集賢士論共榮其兩命臣學非一子而寵萃一時雖出誤知難安愚分儻不量牛馬之走乃或冒熊魚之兼必噴煩言上辜洪造願俯從於固避庶無負於曲成

辭免實錄院同修撰奏狀

洪邁

聞命震驚罔知所措眷史筆之重任極昔賢之所難况在於臣無能為役豫編摩之列曾莫補於毫分新論撰之官乃頓躋於位次惟欽廟下堂之典有著庭累歲之功藉日曆之既成奉雲章之改作昇之兼職已愧竊榮優以隆恩故難虛受伏望皇帝陛下軫聰明而下逮念名實之相孚察其所安俾續舊服庶少逃於官謗以上答於特知所有恩命臣未敢祇受

# 修玉牒官

提舉檢討官並附

歷代沿革

歷代

玉牒官無定員掌修皇帝玉牒凡編年以帝紀

帝系而載其歷數及朝廷政令之因革者為之會要 **唐**本宗

正之職開成後始別置修玉牒官宋淳化六年始設局置官

倣唐制也詔以皇宋玉牒為名建玉牒殿于新寺九年以知

制誥劉筠夏竦為修玉牒官自後置一員或二員朱勝非秀

水閑居錄本朝國書嚴奉寶藏未有如玉牒者用金花紅羅

標黃金軸至神宗朝以軸大難於披閱詔為黃金梵夾又以

黃金為匣鎖鑰皆金也進呈畢安奉於宗正寺玉牒殿士太

夫罕有知其制度者予頓在朝廷因宗正丞謝汲自本寺事



論及玉牒間宰執諸公制度趙元鼎曰不過刻如王冊耳云  
 曰國家宗支之蕃自古無乏每朝為一牒宗室官稱名行女  
 與其夫皆錄之以玉刊不其難乎○又中興系年錄注每朝  
 為一牒乃載人主系序及歷年行事如帝紀而差詳其後附  
 以皇后事迹親主宗室子女則有宗蕃慶系錄仙源類譜仙  
 源積慶圖三書詳焉非同為一牒也玉牒則奉安於玉牒殿  
 類譜則安于屬籍堂勝非亦少誤  
 景祐元年宗正寺修玉牒  
 官李淑申請詔以編修院廳西閣子充修纂玉牒之所李淑  
言前修玉牒官馮允亦是兼編修會要蓋錄國史玉牒事節  
須要照會所以只就編修院修纂  
 熙寧三年玉牒于三班院  
 置局後徙編修院皇帝玉牒十年一進修玉牒官並以學士

典領自元豐行官制分隸宗正寺官六年詔宗正寺修玉牒  
 照用日曆所文字並指定所書事令本所節錄元符二年宗  
 正寺丞陳覺民乞將先帝玉牒內聖政令本寺修玉牒官抄  
 寫封送國史院從之紹興十一年襲舊制始建以宰臣一人  
 提舉修玉牒官一人以待從兼凡宗正卿少而下悉與修纂  
 二十九年詔玉牒所併入宗正寺更不置修玉牒官檢討  
 官以本寺少卿及丞同領編修事詔玉牒所宰臣提舉依舊  
 修書官一員同宗正卿丞修纂更不置檢討官中興會要紹  
 興三十二年詔尚書左僕射陳康伯提舉編玉牒後或以參  
 知政事兼書樞密院事兼權提舉乾道元年錢瑞禮以參政  
兼權蔣章以參樞兼權見玉牒所題名記  
 故事玉牒以首相



領之自後相府有闕則以首參兼領仍帶權字淳熙十五年王丞相淮去位周益公以右揆兼領時勅令所纔罷而首參仲至無兼局益公乃奏乞以仲至權提舉玉牒宰相在位而執政權領寶訓玉曆自此始也朝野雜記

羣書要語

生必輝名於玉牒文選

古今事實

特創嘉名

唐開成二年修玉牒官李衢奏功以聖唐玉牒與史冊並驅立號建名期於不朽伏乞付宰臣商量於玉牒之上特創嘉名以光帝籍敕旨宜以皇唐玉牒為名續通典  
重修玉牒

宋朝趙安仁重修玉牒屬籍請依唐室故事修玉牒官奏劉筠夏竦宋綬等為之真宗實錄初梁周翰始創其制而未備安仁重加裁定又為仙源積慶圖皆統列精簡焉同上

殿名玉牒

別籍有五

並見宗正卿門

古今文集

雜著

禮部代宰臣以下進三祖下第六世仙源類譜仁宗

皇帝玉牒賀表

呂伯恭

天發慶源衍皇文而有永國嚴大典章烈祖於無疆今日再蠲上儀交舉中賀竊以建邦啟土胄本出於神明扶世導民德實

專文類聚遺集

卷之五

五



參於化育厚苗裔之憑藉培運曆之靈長炎宋肇興上通元造  
昭陵在御專以至仁垂光罩被於雲來流澤涵濡於億兆厥開  
真主並輯曠文譜增屬籍之華牒冠史臣之錄發揮昌緒見大  
宗小宗之蕃申載宏綱示特書屢書之重源流綜貫典冊崇成  
彝宣祖以來咸星羅於霄極若明道而後實日靖於鴻圖振振  
信厚之風皞皞泰和之治銀潢混漾玉版闕嚴千八百國之封  
先乎異姓五二六經之籍展也同符懿鑠麗洪禹生闔懌恭惟  
皇帝陛下隆恩睦族駿惠紹基帝繫綿延監枝葉本根之輔皇  
猷渾灑思規模架燧之尊式是不彛對于華且臣等參聯庭宴  
親覲邦祺聖統聿傳陋柳芳永泰之譜休聲遠繼慶唐介慶曆  
之詩

代宰臣以下進三祖下第六世仙源類譜畢賀太上  
皇帝表  
呂伯泰

清都絳闕固高視於羣生寶系瞻源實功資於太極告成典冊  
垂裕仍雲中賀竊以顯穹生民濬發皇宗之盛丕夫大律於昭  
帝繫之嚴顯允熙朝肇開聖統德隆澤厚命既僕於萬年曾遠  
族蕃譜方登於六世戚疎區別昭穆派分雖國論民言不至齋  
心服形之地然宗盟家政猶闕開安視膳之時爰練日以龜從  
咸望雲而鰲抃驩騰需臚慶集叢霄恭惟太上皇帝陛下淵靜  
化元希夷物始大綱授舜既蕩蕩以無名九族睦堯本親親而  
有叙光宅穆清之遠具膺蕃衍之祥臣等幸際休辰與觀盛事  
中興功業斯千詠輯於弟兄百世本支陳錫永觀於孫子



代進玉牒表

張孝祥

帝系勅鴻燦科條於屬籍聖謨啓佑嚴訓典於寶儲御嚴廓以  
 觀成拱朝班而稱慶臣切以堯統漢緒肇派別於天潢周誥商  
 盤麗光躋於東壁惟昭穆親疎之有序與文章號令之常傳歷  
 時浸闕於編摩甫歲悉加於纂輯必親經財幸稽春秋簡牘之  
 義故並建殊尤若河洛圖書之出皇帝陛下慶綿景祚志適光  
 猷世茂本支襲生民之尊祖道昭嗣服成下武之繼文考祖宗  
 皆聚此書述遺烈永為大訓臣等猥蒙際遇快覩休嘉麟趾振  
 振共仰宗盟之益茂虞書渾渥更瞻聖作之相輝

辭免提舉編修玉牒劄子

周必大

臣欽承恩渥增震孤衷伏以紀謨烈以示後人繫本支而綿百

世鏤牒本繇於唐代成書觸備於聖朝粵自中興尤嚴故實雖  
 承乏或容於次輔而提綱當俟於元台豈伊具臣堪此衆職矧  
 有僚之不廢在虛次以何嫌仰冀皇明俯昭愚悃免與聞於太  
 典姑曲徇於小廉冒瀆天威臣無任戰栗俟命之至

辭免玉牒所檢討官狀

吳永叔

漁渥昭回孤衷惕厲伏念某素疎文藝尤乏史才直紫微垣既  
 近日星之麗鏤白玉牒復䟽雨露之榮學不足以網羅舊聞識  
 不足以登記大典粵考高廟中興之際藐觀光宗嗣復之初孝  
 祥以柱史兼官官名始稱鏤鑰以月卿貳事事體方隆豈宜異  
 陋之蹤輒與討論之未覽書之十格欲纂述以無能視作者七  
 人於同升而有愧雖官微不應控避然恩重恐速顛隳所有成



# 修日曆官

歷代沿革唐正元初韋執誼奏撰私家紀錄非是望令各撰日曆月終館中詳定從之此日曆所從起也 葉伯益宏詞編題

宋舊以宰臣兼監修國史修撰直館檢討無常員掌修日曆以時政記起居注會集修撰為一代之典舊於門下省置編修院專掌國史實錄修纂日曆元豐四年廢編修院歸史館官制行屬秘書省國史案六年詔秘書省長貳毋得預著作修纂日曆事進書郎繫街以防漏泄如舊編修院法焉八年詔吏部郎中曾肇禮部郎中林希兼著作職事官兼職自此

始元祐五年移國史案置局專掌國史實錄編修日曆以國史院為名隸門下省更不隸秘書省紹聖二年詔日曆還秘書省宣和二年詔罷在京修書諸局惟秘書省日曆所係元豐國史案除著作官專管修纂日曆之事無定員外其元豐分案編修日曆書庫官吏並依元豐法四朝志紹興元年以修日曆所為名又詔秘書長貳通行修纂日曆以少監程俱言長貳於條不與修纂欲準元豐故事著作官闕從本省時暫勝校書郎或正字兼推所責不廢編修故有是命三年詔左僕射呂頤浩兼提舉修國史時修日曆張綱言秘書省權輕難以取會又孫近言景德二年王且為相領史職乞宰府提舉故有是命詔修日曆令侍從官帶史館修撰餘官帶直



史館史館檢討若著作郎佐郎闕依元豐例差郎官兼領時以祠部郎虞漢兼太著禮部郎舒國清兼小著日曆所以修國史日曆所為名四年詔修國史日曆所以史館為名依舊制置編修校勘官十年秦檜請下有司討論史館建併之弊禮部看詳於元豐舊制併歸秘書省國史案以著作郎佐郎修纂日曆遇修正史即置國史院遇修實錄即置實錄院見今修淵聖及今上日曆今宰相提舉以監修國史繫銜實錄院以提舉實錄院繫銜中興會要

古今事實

蔣氏日曆

唐柳芳作唐曆太曆以後闕而不錄宣宗詔蔣偕等分年撰次

盡元和以續云自又至僖三世踵修國史世稱直筆咸云蔣氏日曆

無以易藻

宋朝汪顛謨藻字彥章公言自元符以來並無日曆此國之重事願留聖心上納之既而宰執請擇所付上曰無以易藻矣出知湖州詔領日曆如故辟官屬二員且賜史館修撰餐錢言行錄

古今文集

雜著

謝賜紹熙四年曆日表

周必大

歲運無窮裁成密度王春有淑誕告庶邦吏拜賜以承流民知時而趨事臣某中謝恭惟皇帝陛下道參覆載職備義和天畏



乘軌式九圖而順帝星隆魁德齊七政以授人凡叨守土之官咸起蒼辰之志臣敢不頒宣詔璽勸勉農疇在歷數於舜躬孰能推步暨朔南之禹教尚覲混同

謝賜曆日表

周必大

欽承天道初觀玉曆之成謹授人時均下璽書之賜仰祗德意俯佩恩榮中謝恭惟皇帝陛下輔相兩儀總齊七政大法協於五紀克叙彝倫閏月定乎四時靡垂疆次推本聖心之自蓋先民事之宜故此遐方亦頒密度臣敢不深思奉順務稱嚴恭東作西成行見京垓之積南洽北暢豈惟正朔之同

同前

周必大

欽崇天道課玉曆於清臺謹授人時下璽書於方國凡任承流

之責舉深拜賜之榮中謝恭惟皇帝陛下功錫禹疇德齊舜政炎圖載赫既聰明睿智以有臨皇極用成宜歲月日時之無易申命居卿之職載嚴頒朔之文天始地終得大衍自然之數珠聯璧合驗太初最密之祥誕告多方用興嗣歲臣敢不仰推聖意徧諭封圻九叙惟歌使咸知於帝力三時不害期各厚於民生

同前

周必大

日官推數當五年再閏之期王者頒常下三統四分之曆凡叨守土敢怠承流恭惟皇帝陛下把握陰陽彌綸天地授泰元之神筭協洪範之彝倫水火金木惟修坐致九功之叙歲月日時無易預知百穀之成爰卽上春徧頒密度豈特新又新而無弊



身文苑集卷之三  
蓋將朔復朔以何窮臣一分銅虎之權三拜爾書之賜年運而  
往竊自驚齒髮之衰民愚而神願謹示農桑之候

同前

周必大

參萬歲以成純方衍無疆之數以四時而為柄用頒有截之區  
望雲祇拜於君恩愛日益勤於吏事中謝恭惟皇帝陛下德隆  
廣運化本容庸仰膺申命之休俯謹授時之政地法天而天法  
道據四大以宅中正次王而王次春殖萬民而布治况歲直金  
穰之次而曆符璧合之祥農力藉以無違吏窺文而竊抃臣敢  
不勤敷聖意徧諭部封時和年豐顧已示夢魚之兆家給人足  
愧莫施汗馬之功

謝紹興十四年曆日表

洪邁

清臺課密上元新甲子之符支郡頒常正月謹王春之政拜恩  
喜幸開卷遵行中謝切以觀乎天文有寒暑殺生之候考之人  
事戒析因夷曠之期既水火金木土穀惟修故度量權衡歷算  
道出居陽而治振古如斯洪惟有道之朝高視無前之蹟南司  
北正稽顙帝以建官東作西成憲唐堯之分命爰暨照臨之內  
舉由輔相之宜恭惟皇帝陛下與日並明參天施教執玉帛者  
萬國罔不率從班正朔於八荒無有遠邇永念承流而宣化宜  
息利用以厚生異茲一卷之書俾成四時之吏臣敢不審其作  
輟奉以周旋夜寢夙興雖莫知於帝力春耕秋歛誓勉相於農  
功

福州謝曆日表

洪邁



課自清臺雖朝廷之故事命于方國蓋天子之至恩拜賜為榮  
窺文何幸切以恭三百六旬有六日事蓋備於唐堯律八十一  
寸則一分法益嚴於漢武考輔相裁成之道戒析因夷隩之宜  
皆聚此書以前民用恭惟皇帝陛下乾坤合德曆數在躬上年  
萬壽以無疆紀號一成而不變神祇祖考既安樂於太平歲月  
日時又明章於庶證禮勿忘於告朔聖愈謹於占天肆令宣化  
以承流咸識履端而舉正璿璣不忒玉燭自調臣敢不奉以周  
旋審其作輟聯珠合璧曾何造化之能知流火授衣尚見艱難  
之所致

謝曆日表

洪邁

真主當陽載謹占天之義疇人觀象一新底日之文方中詔之

分頒均外臺而重拜中謝恭惟皇帝陛下堯身為度舜曆在躬  
知天其有五材守而勿失對時而育萬物動則有成常思利用  
以厚生不怠履端而舉止坦然明白奉以周旋臣敢不祇誦成  
書虔遵至意七月流火益知王業之艱難五星連珠莫測聖功  
之輔相

修日曆劄子

張孝祥

臣聞神宗皇帝相王安石用私意作日錄一時政事美則歸已  
陳瑾以死爭之著為尊堯集日錄辨等書忠臣義士感激增氣  
恭惟陛下躬履艱難躋登休治寶慈與倫仁民愛物聖德之盛  
固已聿追先烈而故相信任之專禮遇之隆又非特如安石受  
知於神祖也臣切謂政事舉措號令設施一皆裁自聖斷故相



或能將順贊義而已。臣懼其作時政記亦如安石專用已意掠  
 美自歸。揜陛下之聖明。私羣臣之褒貶。日曆之官。因取其說。著  
 之簡策。殆非尊戴君父。傳信萬世之義。臣仰惟陛下既選選史  
 臣。付以論撰。欲望駿發明詔。再取去歲以前。臣寮修過日曆。詳  
 加是正。審訂事實。貶黜私說。發明聖德。庶幾作宋一經。襲六為  
 七。垂之無窮。天下幸甚。

辭免修日曆轉官奏狀

周必大

臣聞命若驚。措身無所。切以舜受堯禪。光華二典之中。武承文  
 謨。度越二王之上。又罕聞於並世。今親值於同時。蓋國家甚盛  
 之規實。儒學難逢之會。而臣猥繇薄技。久竊殊知。供奉螭坳。預  
 初載史臣之高選。周旋麟省。窺兩朝日曆之宏綱。逮茲荐履於

禁嚴。適遇再陳於篇秩。故四周於歲律。而疊進於官榮。夫何總  
 覈之朝。有此便蕃之寵。自猶知其過矣。人豈謂之當然。伏望陛  
 下天造無私。日光必照。念臣遭逢千一。雖與眾同。察臣僥倖再  
 三。則惟已獨。或遂寢出綸之命。或量裁考績之年。稍令私義之  
 交。實賴公朝之賜。

占天萬年曆序

祝天輔

竊以曆用於世久矣。自堯命官以明歷象。舜齊政以察璣衡。降  
 是無代無之。然由古及今。泯泯焚焚。或以或近。間行隨故。殆未  
 有能盡歟。抑推步籌策。有不能精歟。國朝初曆。今幾易矣。元祐  
 觀夫法行之纒十餘年。而遠有晦朔之差。姚舜輔以一介草茅。  
 卒能指其所失。而伸其所視。蓋闔臺之史。莫有能屈之者。豈非



法為世出而人為時舉者歟新曆來上上既命以占夫為名且命臣為之序臣以區區所聞敢不盡愚臣聞知天之所為知人之所為至矣苟蔽于天而不知人則溺于吉凶禍福之說而去就從違必決于此而後行苟蔽于人而不知天則率乎是非成敗之迹而可否因革有不待時而舉是則兩失之矣唯聖人不徇天以絕人而知有以修其事業不乘人以誣天而知有以奉其時令故動則獲福為斯得名而影響之應問不容髮者豈預有所推測而致然歟蓋知要而務實則天亦從而畀之矣此以入占天之道也伏惟皇帝陛下道極天人躬包歷數體乾坤之闔闢順陰陽之慘舒其施為注錯方且與天合德而雖先時弗違矣其有季也於未占而先成其可占也於既孚而後見則天

人幾於一致然猶且先修乎人事而後占於天所謂知要而務實者不期於天畀而天畀之矣曆法之修特以考人事之至與未至者爾其精數明時所以追太初而並太衍且將以建萬世一定之法而為有宋不刊之典者尚不論也然則臣何以知其然哉揚子曰史以入占人聖人以人占天觀陛下命曆之名臣於是乎知臣謹序

### 修會要官

歷代沿革唐德宗正元間蘇冕始為唐會要四十卷武宗時崔鉉又續四十卷宋建隆初王溥取宣宗以後故事并蘇崔所錄共為一百卷本朝會要自建隆止慶曆四年成一百五十



章得象上王洙編修王珪續以慶曆止熙寧十年通舊增損成三百卷總二十一類八百五十五門國朝會要序乾道四年詔尚書左僕射陳俊卿兼提舉編修國朝會要五年秘書少監汪大猷等言蔡攸所修國朝會要除將熙寧十年以前章得象王珪所修重加刪潤外其自元豐至政和止修得帝系后妃吉禮三門攸所修吉禮緣當時議論好惡不同妄有刪改以迎時好乞令本省再加刪定兼今來續修斷自神宗其五朝會要內有熙寧十年內事亦合重行編入以續修國朝會要為名從之六年中書門下省言國朝會要已修至靖康詔今自建炎元年接續至乾道五年九月秘書少監陳騷言編類建炎以後會要至紹興三十二年六月十一日成

書以中興會要為名從之孝宗會要

# 提舉修敕令

詳定官附

歷代沿革宋天聖慶曆嘉祐熙寧編叙及元符勅令格式各差

宰臣提舉此事見續會要何執中奏而四朝志乃云自熙寧

初編修王司命宰相王安石提舉如志所言是日熙寧

始也然天聖既有提舉之例不應自熙寧始今姑存之以俟

考究詳定官以待從之通法令者充政和元年差左僕射何

執中提舉重修敕令執中上章力辭於是不帶提舉以兼領

為名續會要建炎四年命宰臣范宗尹提舉重修詳定敕令

至是始設官置局命大理寺及見在敕局官兼詳定刪定官



中興會要 紹興三十二年 孝宗已即位未改元 六月權吏部

侍郎徐度等言近措置哀集建炎紹興已來詔旨專一置局  
今來所名取自朝廷旨揮詔依舊以敕令所為名會要紹定

中改為詳定一司敕令所自建炎四年以前著為紹興新法  
以後續降幾二萬餘條前後牴牾職源乾道四年詔差刑部

侍郎王大猷兼詳定官理少王彥洪韓元吉兼同詳定官刑  
郎蔡洸劉芮吏郎鄭伯熊戶部曾逮理丞潘景兼刪定官限

一年了畢六年汪大猷奏合行事件請行刑削於是復置敕  
令所提舉官銜繫兼詳定一司敕令詳定官銜繫兼詳定一

司敕令並依舊例施行係孝宗會要修入○此後淳熙慶元  
嘉泰及今上淳祐各有頒降敕令格式 **宋初修軍馬司敕則**

屬樞密仁宗時命田况提舉熙寧八年權知審刑院崔日符  
言奉詔修軍馬司敕緣軍政事重故事以樞臣總領於是命  
樞密使陳升之提舉管為續會要紹聖元年又詔知樞密院  
事韓忠彥提舉管為詳定刪定軍馬司敕令

古今事實

前律後令

漢杜周為廷尉客有謂周曰君為天下決平不循三尺法周曰  
三尺安出哉前主所是著為律後主所是疏為令當時為是何  
古之法乎本傳

鈞金束失

李延年論刑法第二表周禮鈞金束失慎之至也



金條玉科

刑法曰金條玉科 劇秦羨新論

牙章竹簡

牙章竹簡之中因以法吏

古今文集

雜著

請修勅令

劉華

臣竊以法者天下之大命也。先王制法其意使人易避而難犯。故至簡至直而足以盡天下之理。後世法制唯恐有罪者之或失也。故多張綱目而民於是無所措其手足矣。世輕世重唯聖人爲能變通之。祖宗之初法令至約而行之可久。其後大較不

過十年一變法。豈天下之大民物之衆事日益滋則法不可以不密歟。臣竊以謂非事多而後法密也。殆法繁而後姦生也。神宗皇帝達因革之妙。慎重憲禁。元豐中命有司編修勅令。凡舊載於勅者多移之於令。蓋違勅之法重違令之罪輕。此足以見神宗皇帝仁厚之德。哀矜萬方。欲寬斯人之所犯。恩施甚大也。而所司不能究宣主德推廣其間。乃增多條目。離析舊制。用一言之偏而立一法。因一事之變而生一條。其意煩苛。其文晦隱。不足以該萬物之理。達天下之情。行之幾時。蓋已屢變。今所謂續降者。每半年一頒。每次不減數帙矣。夫法者天下之至公也。造之而不能通。故行之而不能久。其理然也。又續降不顯言其所衝改。故官司州縣承用從事。參差抵牾。本末不應。非所謂講



若畫一通天下之志者也。臣愚以謂宜有所加損潤澤之去其繁密合其離散要在簡易明白使民有避而知所謂遷延遲罪之意伏望聖慈酌時之宜完法之用選擇儒臣一二有學術明於治體練達民政者將慶曆嘉祐以來舊勅與新勅參照去取略行刪正以成一代之典施之無窮

辭免兼勅局劄子

周必大

臣承詔惕息周知所措竊惟執政之兼書局初無定例同升或容分領未至奚必曲成今者良臣陳義其高過於謙損臣若汗顏代斷獨不愧晉人其下皆遜之語乎况臣鄙樸無能超踰已甚律設大法憤然弗知將何以助陛下三章之約贊相臣畫一之講今早已嘗回奏天聽未回須至再有陳免伏望聖慈於臣

惶恐不自安之意特降睿旨俯從所請許仍其舊臣無任懇道俟命之至

勅令所題名記

陳居仁

乾道四年冬有司言建炎後續百幾二萬餘條前後舛不合請削為書俾吏不得舞詔可之六年秋復置詳定一司勅令所初本朝重令申每詔諸儒纂修自天聖熙寧元祐以來有詳定編勅所編修諸司勅式所重修勅令所其設局不一最後獨存今名渡江因之而累朝太典用以秩序矣書既婁奏御賞煩費後官寢冗紹興末例罷去至是始復之然視曩時官省二之一史胥徒省二之一凡共億之事又大省惟不務為虛文而典領則並委一二大臣不敢少損焉示二尺重事必有致其要以詔官



府又所置剛定員率資歷未可登他曹則於此乎儲之士得優游其間歛身於防益明習國家憲令以適於務夫謹法度廣賢才上之復是官也抑豈為無旨哉剛定有以他官兼詳定有為同者中又省去今定為提舉官二以屬宰相同提舉一以屬執政詳定一從官為之詳定官五蓋以今為著曹以典領重故也因得附離姓名于壁淳熙戊申四月記

建隆編勅序

呂伯恭

太祖皇帝受命穆清肇造區夏建隆之元號為天地重開運命左右之臣申明憲章論次律令創業垂統為萬世則越四年七月己卯判大理寺臣儀上建隆編勅四卷宏規丕矩易簡坦明揭於象魏藏於有司職於秋官盼於郡國用啟祐後聖繼繼承

承威以正罔缺確乎致治之成法也臣滬承聖涯固不足以測知乾坤闡闢之緼然職在翰墨其可以詞語淺薄為解謹齋心極思而序之曰一天下者必不嗜殺人然後定惟五代之亂疆陵弱眾暴寡無知之氓奔者聘欲取三尺法猶弁髦土梗而大奔之奪攘不忌剽劫顯行上之人厭苦其難治於是為一切之法以求勝民不師古始墮壞先主金科玉條之制相夸以虐相高以險奇請他比溢於几閣黥胥老吏生死於簿書之間猶不能徧識于機萬筭閔民而納之死悍臣酷吏奮再抵案斬艾擊斷專決不請駢首就戮血流波道民舉足而蹈陷穽側身而入河海靡衣媮食不為終日之計時君偃然自以防民之具高視前世然法出姦生令下詐起姦究無窮而鈇鉞不足凶威毒燄



腥聞于天上帝震怒崇降罪疾亦罔克永世惟我藝祖奄受方  
夏代虐以寬當守太息思欲滌除苛法撥亂世而反之正深詔  
通明乎恕之士傳以經誼蔽以人情成書之布前自后凡較然  
畫一以四卷之簡而馭億萬生齒之繁風流篤厚禁罔踈闊斯  
民安土樂生不敢以身試法駸駸乎圜空刑措之治矣昔之為  
法愈多而犯法亦多今之為法愈寡而犯法亦寡昔之防民日  
嚴而民日慢今之防民日寬而民日謹昔之吏屈首朱墨而不  
足今之吏從容畫諾而有餘是知為治之道果在此而不在彼  
也深仁厚澤克開厥後民之戴宋永永無窮後世雖有作者蔑  
有加於此矣世之議者或謂藝祖之法以威克厥愛為王臣竊  
以為聖人之用刑若醫者之用藥當疾之初乎藥店亦可一朝

去也必俟元氣稍勝則藥石稍損元氣俱復則藥石俱捐藝祖  
拔民於水火之中如疾之初乎者也故於前代之刑猶存十一  
於千百至於後聖教化益明則刑益輕慶曆嘉祐以來鞭笞之  
罰不上于士大夫實推本藝祖好生之德孰謂其尚威乎臣懼  
後之有司不察藝祖制法之原謹復列之於末以告來者

## 刪定官

歷代沿革宋舊刪定無常員太觀二年詔六曹刪定官併入詳  
定一司勅令所為一局四朝志後省紹興十二年徐度申請  
哀集建炎紹興詔旨今專置一局乞權行復置刪定官以三  
員為額於行在職事官內差兼詔依舊以勅令所為名後省



乾道六年復置勅令所。汪太猷申請正差刪定官。乞繫銜充詳定。一司敕令所刪定官兼刪定官。繫銜兼詳定。一司敕令所刪定官。淳熙十五年林栗申請廢勅令局刪定官。並照淳熙二年復置局差刪修官三員。勅令所題名。

古今事實

勅重令輕

宋朝錢象先知律令。屢為刑法官。預修慶曆嘉祐編勅及州縣諸路條貫。常以犯勅者重。犯令者輕。請移勅文入令者甚衆。又嘗議告捕法。以為罪有可告捕者。皆許捕。則姦民得依法以害善良。因省去許捕之條百餘。其持法近厚如此。勅成例進勳爵。仁宗以其母老。有以慰之。乃獨賜公三品服。神宗實錄。

人物為寶

左文林郎刪定官鄭剛中字亨仲。引對願下詔。不得以虛名文具欺周朝廷。翌日進呈。上曰。近所引對多是人材。朕雖得珠玉珍玩。不足以為寶。但冀得十數人物。乃足為寶也。令學士院降詔出榜朝堂。以剛中為左宣教郎。充樞密院編修官。中興繫年錄。

好古識奇

本才公麟字伯時。用陸佃薦為刪定官。公麟博學好古。多識奇字。東都事略。

入對三事

勅令所刪定官金安節入對上三事。曰。人才當長養成。就之。取其第一奏。行于旬日。以為司農丞。系年錄。



訪求舊史

汪大猷乞重修法令上極以為已任推舉詳明通練之士以自  
佐訪求舊史網羅故牘年餘書成孝宗取進本列於選德殿之  
左右朝夕觀覽樓文姬集

史館校勘

歷代沿革兩京新詔省內本統經史及太史曆象之職後並為  
列曹惟主寫書校勘而已會要

古今事實

文章召為

宋朝歐陽修以文章冠天下景祐初召試為館閣校勘東都事略

釋褐召試

范鎮字景仁成都人舉進士為禮部第一釋褐用參知政事王  
舉正薦召試學士院除館閣校勘同上

古今文集

古詩

勤書

孫僅

儒家無事外招客勤書編筆墨東西置案黃次第研煩憂傷點  
竄細恐誤流傳改易文辭正增加字數全端坐窮令古披襟見  
聖賢得與忘昏曉題名記歲年樓臺思確論廢卷為忘篇魚魯  
皆刪定誰人敢闕然

律詩



答曾無疑校勘

劉克莊

詩到黃初字永和半生西望邈明河已招學士來儒館更欠山人拜諫坡四庫舊書存有幾五朝遺老苦無多傳聞將講臨雍禮小駐驪駒白玉珂

和鄭雙棧

楊炯

銅門初下辟石館始沉研遊霧千金字飛雲五色牋

六曹部遺

### 六部監門

歷代沿革古無此官宋渡江後紹興二年詔置六部監門官一員從堂除差從人吏部尚書沈與求之請也尋詔六部長貳

踏迷秦差沈與求等舉新平江府通判董將詔依中與會要 隸尚書左右選見中與會要尚書左遷注 內遷則為寺監丞或權郎外除至有為諸路總領者紹興十年呂即中希常二十四年蘇寺丞振是也乾道後補外止為州內遷止為寺監簿紹興後又有為添停者其遷寔輕矣朝野雜記

古今事實

選文臣充

紹興二年詔置六部監門官一員選陞朝人文臣有方力人充仍令六部長貳奏差中與會要

依寺監丞

詔置六部監門官序位請給依寺監丞同上

事文類聚遺集

卷之五

三



掌司門鑰

掌司門鑰之嚴 胡文恭行呂惟簡制 更司門鑰 許公集制

古今文集

雜著

六部門官廳壁記

陳國袁

乾道登號之七年。厥既庶職咸理。共趨平治。上思以固其勤也。有詔百執事。亦而入畫。采而退。小大之吏。罔不惟上訓。是迪無或敢有侏。豫而六部寔天下政事之樞。綱自要領。闡在是故。奉詔益嚴。非他攸司比也。凡部官。邇未之出入。疾病之懸告。與其謁制之可吝。悉聞諸部。門部門受其出入之時。以聽上稽訪。司存蓋至是而愈重矣。方是時。奉行列曹之命。以正胥吏。

之失。賢長貳。竟懲決以導。張官之意。抑猶其細事也。南陽韓君子厚。其粹而度來。居是官。始至。適遇勤政之詔。則遂環顧其職。以謂舉天下之政事。悉囿諸六曹。職有弛張。事之廢興。基焉。今誠職於中者。操筆疾書。略不敢後。猶後羣有司。下宜而門官者。倘不能先時而至。抵其出入。而聽其命。是亡具也。則盡棄去。一切格敬厥事。復撥其餘力。以取前任人名氏。自董將而下。皆書石。而饒之。嗚呼。天下之事。要毋忽其小者。爾昔鄭子產聞盜。而為門者。而春秋犯門之誅。謂于國紀。子厚既盡力。門職於古。無愧。又補直鑰。漏不數於其小者。題名蓋其一也。斯友而顧天下事矣。難哉。官建於紹興之二年。法以陞朝。有才力者。迺在選。而班祿。既寺監丞。其自是為丞郎者。凡十有五人焉。君子謂是官。



也為要職乾道八年歲在壬辰執除十二月且日記

續紀

陸坡

部門有官中興初制也凡天下之事隸于部其綱要有六其司  
存一于有四其間劇易不同皆足以展四體司鑰者止議其出  
入奉列曹之命惟謹夜漏未盡僕僕趨局不敢後長貳未退則  
屏息以俟率是為常雖欲求以自見不可得然則是官豈徒設  
哉國家官人以才儲才有地其始進而需用於部者有一焉錄  
京秩則為門官錄小選則為架閣一官資歷雖殊職間無事則  
相似大抵不以才用而以才選也嘉禾蔡君開以邑最稱方退  
就銓得侔黃岡忽有旨故畀廟論以恬靜特選之益信其選為  
不輕甫蒞事按求題名之舊歲久員溢書止於王麟闕而不紀

向之隱是而得摩節者適致餐錢乃勒堅珉彙次官氏自傳誠  
以才各謹其歲月俾來者相繼登載若迺因名以跡其實頭晦  
升沉未容既論而其卓然著見者亦得以託不朽後之覽者思  
其所可繼省其所不逮俛焉日孜孜常恐無以稱上之選毋徒  
兀兀坐曹諉曰無所事姑賦為進步之階必使所居官錄是夫  
焉斯可矣手指目視是杏標然豈苟以為觀美云嘉定初元臘  
日記

# 六部架閣

歷代沿革

古無此官

宋元豐有六曹架閣庫

續會要

崇寧元年

何執中為吏部尚書四選按集吏藏于家以舞文取貲執中



請置庫架閣命官泄之是後六曹依舊置宣和二年罷續會要宣和二年戶部勘會紹興二年立六部架閣庫中興題名記

古今事實

各差一員

紹興十五年詔復置官吏部戶部各差一員禮部兵部共差一員刑部工部各差一員以主管尚書某部架閣為名中興會要

舊制有二

舊制官庀其司置于六部之內或遇其廢則以省郎兼之否則以監六部門兼之迨于紹興寺丞簿正官俱復然始庀司于外一也舊制金耀門文書庫多歲三司帳籍三司今版曹也自銓曹而下儲藏帳籍之所未之聞焉其後置六部架閣下大抵成

案留部二年然後界而藏之又六年則入之金耀今金耀無復曩日則悉藏於架閣庫二也二者不同而至于諸曹二十四司之文章盡諸儲蓄以待有用則今猶昔也中興題名

論當世故

杜莘老字起莘以珍南一教授客中都見九重方更化因上書執政執政偉其說薦為六部架閣明年禁見東方公奏對直論當世之故語益切直遷為刪定劉後溪撰文集

周書漢故

其任似周司書其選似漢掌故中興題名

古今文集

雜著



論架閣庫文字

周必大

臣聞先收圖籍者賢相之規模綠絕簿書者姦吏之常態今天下之事其來無窮故六曹文書鱗次山積紹興十五年五月初復主管架閣官遂部置庫凡文案皆謹藏之置都籍焉二十七年九月又詔文書已結絕過二年者以歲月先後分類字號編次架閣仍月輪逐曹即官點檢具有無遺失申尚書省法意非不善也其如歲月滋久浸不加省屋宇踈漏風雨弗蔽至其甚則吏惡害已而去其籍每見四方之人經部陳理身事者稍涉歲月吏必以無案牘為解是豈可不申嚴舊法而為之制哉臣愚欲望聖慈委還部主管官將所置都籍逐一點勘每月赴部書押令郎官至期躬親檢察如紹興之制仍置一般簿籍置藏

於長貳廳以備參考間遇取索案祖須即官押帖子下主管官方許封送合千人毋得擅啟庶幾積弊稍革不失有司之職其庫屋踈漏者亦乞降指揮早行修葺免致推毀取進止

乞修架閣庫

周必大

臣先於淳熙二年十月內曾奏陳六部架閣庫文書浩繁屋宇損弊乞照紹興十五年置庫指揮嚴加整葺及令有司早行修葺當時曾奉聖旨依奏其庫屋令臨安府檢計修葺經今又已四年近日輪郎官點檢則所謂屋者仰視乃與天通傍觀殆無壁落兩月前曾有人艤舟于岸偷竊吏部案卷勅黃之類欲載往外州作故紙出賣既覺察擒捕即投棄水中慢藏誨盜必至於此臣愚欲望聖慈詔有司日下計料修整毋若往歲視為閑



慢官司虛降旨揮兼六部架閣主管官共四員自來臨安府應副居止若就庫側兌換解舍使其朝夕便於檢校免致疎失亦關防之要術也所有臣元劄子併錄在前今取進止

六部架閣廳壁記

基更生

皇朝景德中置金耀門書庫貯三司文案隸尚書省架閣有庫蓋未嘗見省而始及部也崇寧大臣初二夫官建議置吏部架閣官其後六曹皆設繼迺省去訖宣和再置再省紹興三年六部悉有架閣庫十有五年置官四人禮兵一人刑土一人吏戶各一人曹始備官特詳於部而無復及於省矣省有留贖藏諸房雖兩歲一遣架閣然屋室頽漏上雨旁風擲棄地間誰與顧省鼠噬蛛絲蒸鬱廢漚不可收拾吏有絕無才藝他司棄而

不收者始竄名是間虛沾名俸而其身未始一到間有檢討湯然不知所存不得已而下取之部回還曲折稽緩後時卒不可得朝廷深察其弊乃議建官即省閣之申維創以為庫初立廳事後植閣三間旁為兩翼蓋因修省之餘材凡踈壁寢既卑且漏不足以備充棟之藏架閣官基更生首切是選力請於朝得緡錢二千有畸增其閣十二共為十有六間列三省密院為四庫衍廳之宇挾而成五門內之右為鑿室直房以便細事外門之左本庫地也今省府貸以為計簿房右復借為潤園皆未敢請復庫之門蓋直東出西則吳山右墻嚮南為戶部度支左墻枕北富民居之道異時書多地狹尚可相其便者而圖展焉三省密院之書既已各列一庫庫列諸房自未置官以並別者為一



書臺官以後其方來者爲一書歲月可稽門例無雜凡有前朝御筆者則朱箱金瑣炷香而藏于閣之中所以見尊君之義也肩鏑森嚴出納有籍規式詳備吏不得欺是直有益於官不可謂緩而不切者也嘗觀唐六典書載亭長掌固兩屬于尚書省亭長主守省門通傳禁約掌固與亭長皆同番上悉爲省屬今嘉定甲戌朝廷既謂部有司門省則並置明年乙亥以部有掌故省亦建官是唐朝之亭長掌固與景德之省有書庫者今皆舉而復之矣傳曰修廢官四方之政行焉是不容無紀用取架閣官姓名由今洎後刻於下方嘉定九年三月吉日記

六部架閣庫題名記

李大異

皇朝肇建中臺分六官而設之屬文書之夥月益歲滋枋在胥

手並緣姦蠹識者病之崇寧間何公執中爲吏部侍郎始建議置吏部架閣官於是棟架萬數揭而目之前最後凡一索而獲人以爲便後諸曹皆置官如吏部之制未幾悉省之迄宣和再置省紹興三年立六部架閣庫十五年復置官四人今四十七年矣異時百司庶府皆有欵刻以識前後居官者茲獨因仍闕而未著紹興二年主管官王君次春陳君邕雷君孝友相與哀集題名二月題名成屬大異爲之記大異竊惟古昔以來圖籍爲重是官之建寔謹其藏其任似周司書其選似漢掌故可以攷閱故新尋緒本元所謂若緩而急者嘗試以舊章參之今日雖或稍異而其歸則同舊制官在司置于六部之內或遇其廢則以卽省兼之否則以監六部門兼之迨于紹興寺監簿正



官俱復然始在司于外一也舊制金耀門文書庫多藏三司帳籍三司今版曹也自銓曹而下儲藏帳籍之所未之詳焉其後置六部架閣庫大抵成案留部二年然後昇而藏之又八年則委之金耀今金耀無復曩日則悉藏於架閣庫二也二者不同而至於諸曹二十四司之文書監歸儲蓄以待有用則今猶昔也夫豈特文書為然惟官亦然故其職間無事視他司為最自公退食得以披冊讀書充其素業疇昔著定有缺多于此焉取之朝廷之於士可謂無負矣雖然凡士之處於世道積厥躬德足乎已者皆儲蓄之義也知此則無負於朝廷矣大異虛薄不足笑雖嘗居是官而於此有愧焉愧焉而復言之蓋自知其不能而將以懋夫能者也題名之作所以書名氏紀歲月其有軼

而不可致者如嗣後之人續志之惟書建官之本意以命鑄者

六部架閣續題名記

徐清叟

六部架閣置主菅官周司書漢掌故遺意也國朝沿革廢置李公大異紀載已詳不復贅竊惟是官之設豈特掌若吏若戶若禮兵若刑工故積而已哉凡庠序之英科自之彥公卿大夫子弟之俊秀者朝家就有擢用必儲以是職以待學官二令之闕其選至不輕而重然余嘗摩娑石刻自南渡紹興以來至於今日凡百有餘年其間賢宰執名法從有焉給舍臺諫風采振揚者有焉擁麾節于外能以澄清靡撫為意者有焉得久維多而姓名黜黜與草木俱腐者亦未覓有之然則居是官者詎可無以大是官歟寶祐元年春三月第四題名立石黃君叔度偕同



列以余嘗主戶曹之籍，囑余為之記。辭不獲命，乃作而言曰：余老矣，徒賴無補，不足為故府重也。諸君進未可量，且職清事簡，尚羊金耀之門，會聚津雲之閣，益亦相與講明立身行己之大方，培養康時濟世之遠業，求以無負明時之選掄。音乎若夫攜簿書以為能玩歲月，以覬遷則非余之所望也。眾曰：唯因書以詔來者。

六部架閣續題名記

朱鶴孫

士君子生覆載間，小而為天下國家大，而用天下國家，要必有攸始也。掌故其登朝之始乎？國家置是官為儲材地，由是歷清要，登寶顯者，相踵孰正孰邪，孰忠孰佞，攷之題名班如也。羅君京子一日謁余而言曰：故府題名又續石矣。子嘗居是官，幸與

序其首，余應之曰：是石也，豈將以矜名位而誇後世乎？抑將以昭令德而垂無窮乎？豈將以紀歲月而示久近乎？抑將以著徽惡而寓鑒戒乎？端純鯁鯨乃石之榮，依阿苟容斯石之羞。千載而下，是非善惡皆於是乎求之，噫，可畏也。雖然，聲應氣求，各從其類，盛衰消長亦惟其時。周之司書，即今掌故是也。當時不繫之他官，而必屬之冢宰，意有在矣。方今聖賢相逢，登明選公，實為諸君子之遇，蓋勉厥始，用昌厥施，庶斯石無玷，而故府有光焉。羅君曰：然，請書以誌。

新編古今事文類聚遺集卷之五終



*[Faint bleed-through text from the reverse side of the page]*

新編古今事文類聚遺集卷之六

建安 祝淵 宗禮 編

金陵 唐富春 子和 刊

寺監部遺

總九卿

補新集諸寺部之首

歷代公董實制九卿固亦九卿周六官是為六卿又立少師少

傅少保是為三孤與六卿為九前漢百官志漢以太常光祿

勳衛尉太僕廷尉大鴻臚宗正太司農少府亦謂之九寺太

卿又置十二卿執金吾大長秋將作大匠後漢分屬太尉司

徒司空天監中象四時置十二卿春卿太常宗正司夏卿

事文類聚遺集 卷之六



太府少府太僕 秋卿 衛尉廷尉太匠 又卿 光祿鴻臚太舟即

都水 後魏置六卿 各有少卿 北齊謂之九寺 隋唐因之 龍朔

改名凡卿皆加正字 若太常卿為奉常正卿 後復舊又九寺

皆曰棘卿 見通典分紀 宋朝雖設九卿皆以為命官之品

秩而無職事 元豐正名始有職掌 中興以來併省九職除太

常寺太理寺不罷外 宗正以太常兼而衛尉併兵部太僕併

戶部太府司農併戶部 光祿鴻臚併禮部 紹聖復置宗正太

府司農餘遂廢 中興會要

羣書要語卿慶也言萬國慶賴之 釋名卿士惟月 書洪範王之

卿六命 周禮 面三槐左九棘孤卿大夫位焉 外有九室九卿

朝焉 並同上 國卿君之貳也民之主也 君之卿佐是謂股肱

並左傳 舉一國之高以為九卿 淮南子 恤我九列 九卿也 荀

玄成傳 曹太子來朝賓之以上卿禮也 左傳 齊宣王問卿曰有

貴戚之卿有異姓之卿 孟子 九卿法北斗 公紀 九卿法河海 春

秋漢舍孽 九卿通寒暑 晉志 天子立三公九卿所以順成其天

道 白虎通 九卿位為列棘 南史 伊尹曰九卿之事常在於德

六卿分職以倡九牧 九卿者所以參三公也 並說苑 高冠兩

梁入綴班於九列 歲表類 列卿犀節 同上

詩句 猷納開東觀君王問長卿 杜詩 卿月昇金掌王春度玉墀

杜送馬大卿赴關 九寺名卿才思雄 姚合同 諸公會 太府 諸卿

古人事實

管仲授禮



齊侯使管夷吾平戎于王王以上卿之禮饗管仲仲受下卿之禮而還左傳

敬仲辭位

齊侯使敬仲為卿辭曰羈旅之臣敢辱高位以速官謗同上

不如臨貴

齊桓公使管仲治國對曰不如臨貴桓公以為上卿

不如魏絳

晉悼公使張老為卿辭曰臣不如魏絳之智能治大官其仁可以利公室君在卿位內外必平國語

三珪之位

楚昭王進屠羊說以三珪之位謂三卿皆執珪莊子

賜金百鎰

虞卿躡蹻擔簦一說趙孝成王賜金百鎰再見上卿史記

龜鈕犀印

漢官儀曰卿秩中二千石孝武令通官印方寸太龜鈕又司馬彪漢書曰二千石以下至四百石佩兩印皆以黑犀

藻衣花綬

漢官儀曰衣裳卿大夫藻衣綬青地桃花三彩又純扇朱輪參差文映藻衣花綬焜燁生光初學記

再登四至

濮陽段宏始事蓋侯信信任宏官亦再登九卿史記前漢許商善美四至九卿儒林傳又續漢書汲黯姊之子司馬安巧宦四



至九卿

參決朝議

古之上卿次公一等。至於西漢每與列侯參決朝議。類要

主治萬事

三公北三星曰九卿。主治萬事。隋志

號曰名卿

牟容為太司農。性明白。號曰名卿。東觀漢記

惟月象河

長慶元年給事。帝景封還駙馬劉士涇為太僕卿。制云惟月鷹名象河稱重。

行有佩玉

後漢左雄言九卿位亞三事。班在大官。行有佩玉之節。動有庠序之式。左雄傳

身帶三綬

馬防位至九卿。上絕席。身帶三綬。寵貴至盛也。職官分紀

### 籍田令

補新集司農卿之後

歷代公董。圖為甸師。漢文帝感賈誼之言。始開籍田。置令丞。掌耕國廟社稷之田。春始東耕於籍田。祠先農。大賜二輔。二百里。孝弟力田。二老。帛種百穀。收萬斛。立為籍田館。穀皆以給祭。天地宗廟群神之祀。東漢及魏闕晉武復置。江左省。宋元嘉中又置。通典

宋朝掌帝籍耕耨出納之事。五穀蔬菓藏



水以待用四朝志元豐三年詔籍田令隸太常寺續會要渡

江初闕紹興十五年初除康與之為籍田令二十一年詔籍田司權罷官吏並罷後復置中興會要

羣書要語春籍田而祈社稷也詩甸師掌帥其屬而耕耨王籍以時入之以共齋盛周禮

**詩**帝籍開千畝農功先九州王孫守耒耜吏隱極風流永夏豐草木五雲衛郊丘黃山谷規地餘千畝三推示勸耕原穡猶

故字潑麥有新楹日至土膏動雪消泉脉生城中苦羈束野徑得閑行蔣之奇

**古今事實**

天子親耕之禮

宣王不籍於千畝號文公諫曰古者太史順時視事上氣震發農祥晨正先時九日太史告稷稷以告王乃使司徒咸戒公卿百吏庶民司空除壇千籍命農大夫咸戒農用先時五日即齋宮百官御事各即其齋三日王乃淳濯饗之及期王裸鬯饗醴乃行百官庶民畢從及籍后稷監之膳夫農正陳藉禮太史贊王王耕一揆班之三庶人修於千畝其后稷功太史監之司徒省民太史監之畢太史陳饗王飲太宰班管之庶民終食是日也則徧戒百姓紀農協功曰陰陽分布震雷出滯土不備墾辟在司寇乃命其旅曰徇農師一之農正再之后稷三之司空四之司徒五之太保六之太師七之太史八之宗伯九之王則大徇耨穫亦如之民用莫不震動恪恭于農王弗聽史周紀



立表籍田賦

宋朝杜華老兼籍田司千畝皆上腴而歲取其薄耕者行賦以  
爭射吏每於歲首步頃畝視賦之厚薄為予奪疆畝所接皆苦  
之至是舉故事請度田華老曰是無盈縮安用度乃立表大書  
於四境且籍耕者賦耕田有定數吏縮手不得傍近民感悅至  
今賴之中興系年錄

古今文集

雜著

籍田賦

王禹偁

臣謹按周制孟春之月天子親載耒耜躬耕籍田務本勸農之  
道也所以事天地山川社稷先古禮路榮盛于是乎取之恭之

至也自周德下衰禮文殘缺故宣王之時有號公之諫秦皇定  
霸鮮克由禮漢祖隆興日不暇給孝文孝景至獲行焉昭帝弄  
田亦其義也後漢永平中明帝東巡耕于懷縣非古制焉魏氏  
親耕闕百官之禮蓋草創也晉侯太始之年略修墜典宋文元  
嘉之代亦舉豫章齊用于亥之辰梁以建卯之月後魏北齊沿  
革有異隋朝唐室文物可觀太宗行之于前明堂繼之于後自  
茲已降廢而不行將煥先農必待真主皇家享國二千載陛下  
嗣位十四年武功已成文理已定乃下明詔耕于東郊禮也百  
執于是悅隨二農以乏知勸禮官博士蹈舞而草儀甸師齊夫  
歌詠而供職長洲縣令王禹偁聞而揚言曰耕籍之義大矣哉  
千畝之田三推之禮所以教諸侯而事上帝率人力而成歲功



實邦國之彙章皇王之大禮昔潘安仁賦之于晉今岑文本頌之于唐事美一時語留千載今王道行矣王籍修矣玄功大業煥其有光宜昭頌聲以播樂府望闕拜手謹上籍田賦一首雖不定形容盛德亦賤臣勤拳之懇也其辭曰王四年兮帝業昭宣寰區晏然乃順考於古道將躬耕乎籍田務本勸農稽前文而備矣事神教養舉墜典以行焉萬國歡心而懌懌百官供職以虔虔草儀注於聖代公議章於遺編築壇埴之二陞開阡陌之百畝文物聲明合禮經而有度旌旗衣服應方色而不行既而屆孟春擇元日太史先奏天子將出是月也道人徇路星鳥中律當東郊之迎春是東作之平秩皇帝于是即齋宮辭帝室戒揚鑾嚴警蹕乘青輅以有威儼朱紘而無逸佩乎玉也懸藜

之色蒼蒼載其旂焉干呂之雲鬱鬱屬車負播殖之器後宮獻種稔之實洪厯篤耜服蒞耜以陸離影軛紺轅駕蒼龍而飄焱太常之禮具舉司農之屬各率畋師掌舍驚御陌以惟嚴封人野廬設壝官而靡失于國之東千官景從風伯清塵而習習雨師灑道以濛濛時也木德盛陽氣充春芒甲拆青青而蔥蔥春工脉起油油而溶溶冠蓋蔽野環佩咽風狀浮雲兮隨應龍旂熾張日車從塞空若眾星兮環紫宮修農事以惕惕襲春服之重重尔乃配少昊祀先農尸祝無愧豆籩以供太牢之牲薦之而肥膾太簇之樂奏之而春容于是修帝籍勞聖躬撫御耦以無意復遊場而有蹤將循乎千畝之際豈止于數步之中耕鈞盾之弄田但矜兒戲修建康之王籍未煥農土有以見萬乘之



尊三推而舍或五或九降殺之義有倫尔公尔侯貴賤之班相  
亞裔夫灑種以斯畢庶人終耦而告罷于耦其耕煥乎禮成播  
百穀兮率人力歌載芟兮揚頌聲將見乎餘糧棲畝腐粟如京  
神倉令納其禾黍以備采盛廩義民收其穰藁用餉犧牲親畎  
畝兮化被重人夫而教化自得訓農之資非貪慕古之名然後  
下親壇歸終闕百姓知勸群后咸竭在鎬之宴啓歌虞之音發  
獻萬壽兮歡呼奏九韶兮鏗越行三商之行惠宥五刑而慎罰  
恩流於孝悌力由德被於雕題辨髮興五土之利固必躬而必  
親同三代之風尚不矜而不伐大矣哉籍田之禮豈三年而不  
爲躬耕之義將百代而可知我所以舉已墜之典立不刊之儀  
慮弗勤於四體將有害於三時務農桑兮爲政本興禮樂兮爲

教資民乃力穡歲無阻饑神農斲木之功我其彰矣后稷播時  
之利我得行之供巨豷以斯在公豐年而有期不顯事天之禮  
誕訶祈社之詩祀山川兮神監昭矣配祖考兮德馨遠而永錫  
純嘏用光孝思乃作頌曰倬彼東郊公田是闢大君戾止言耕  
其籍帝籍既修爰及公侯親爾耒耜服爾田疇言採黍稷祀于  
圓丘億萬斯年以永天休又曰倬彼東郊耕壇其崇大君戾止  
言訓其農農功既最俾知榮辱爾家以給尔人以足言奉蒸嘗  
徧于比屋億萬斯年以介景福

籍田記

吳茲

臣嘗觀三代而上禮樂興行凡見聞者咸諭德意遷善遠罪若  
固有之何其盛也蓋其動容周旋舉不外此身教而力行先實



而後名故民之從之也輕迨其未流墮缺不嗣始以禮樂為虛器而世主莫或知其可用間有願治慕古之君不過掇拾容典取其近似者而行之以粉澤太平為美觀而已乃復當饋而嘆以為淳樸澆散不可復追未若政刑之急於用也豈不悖哉竊惟神宗皇帝睿聖生知輔以問學深達禮樂之情不牽不拘故其典章之盛風俗之懿計筭成效莫與比隆雖臣愚不足以識知盛德之所以然然竊於籍田見之惟斯禮之不講尚矣粵自號公大諫宣王不式寥寥史冊曠世一書冒傳頌嘆以為濶典國家承平百年五聖接武所以教民敦本崇孝者甚備然于畝之禮未克是正即于東郊實諸候禮薦享之用取具臨時不獨不虔神考是悼乃詔有司度地國南溝墜廣袤務合於古屹屹

崇壇先農是詞耽耽齋宮於焉祇祓府史徒胥莫不構設統之以令而隸于太常農祥晨正土長冒楹各揚所職無敢不敬迨其西戩嘉穀茂實鍾而藏之是為神廩上帝染盛於是乎出取為酒醴百禮既洽稟稊養牲性則肥碩蕭茅所供下逮果蔬凡歲時所以事天地宗廟者罔不取足於是德馨所聞神其有不懷者乎風雨其時歲以屢豐四方萬里是則是效昏于作勞捐弃末習和順輯睦奉先以孝此誠二帝三王之盛節也與暫行以為美觀者孰得孰失固不待較然未有載之文字刻于金石者臣既撰次其事竊伏思念先皇帝既正王籍矣而未遑三推之事意者留以遺陛下踵而成之乎伏惟皇帝陛下繼志述事此駿惠我神考之烈行聞訓敕有司刺經錯事以舉雍熙明道



之故則臣也望朱絃之光聽鸞輅之音作為歌詩以告成功而繼夫載芟之作其必有日矣臣謹記

籍田議

張凜

臣等前奏帝籍神倉國語宣王即政不籍千畝號公諫曰不可夫民之大事在農上帝之粢盛於是乎出王耕一撥度人終於千畝廩于籍東南鍾而藏之注廩御廩一名神倉東南生長之處鍾聚也謂為藏書所籍田以奉粢盛臣等看詳周禮甸師之職掌率其屬耕耨王籍以時入之以共粢盛詩之載芟春籍田而祈社稷宣王不籍千畝君子譏之春秋諸侯之國尚有御廩自漢及唐亦皆有帝籍神倉蓋先王于天地宗廟之事其醴酪粢盛之所出必專且潔然後可以盡其誠孝而交于神明今帝

籍神倉又廢不設凡祭祀之所用皆索諸市非所以教潔誠也欲乞度地千畝設官掌之以供粢盛為神倉于田之東南餘金略依古制為極嚴奉之意臣等再拜按周禮甸師耕甸王籍以其粢盛又前後漢南齊隋並有籍田今永唐有廩犧令亦掌籍田之事今具立法下項

- 一乞下三司於京城東南標撥田千畝下太常寺舉官丁負充籍田令專切管勾仍令所屬縣知佐同管勾所有召入耕種及合行事金委所管勾官擘畫申請施行
- 一乞下將作監以先農壇就籍田中建置并就田東南建立神倉及祠先農官齋之所其地在千畝之外別具圖子



# 秘書正字

補新集秘書監之後

歷代沿革後漢桓帝初置秘書監掌圖書古今文字考合同典  
 其後監令掌圖籍之紀監述作之事不復專文字之任矣今  
 之正字蓋令監之遺職校書之通制歷代無聞齊集書省有  
 正書秘書省有正字隋唐因之掌刊正文字其官資輕重與  
 校書郎同貞元八年屬集賢殿通典宋初為寄祿官元豐  
 正名姑實有職事編集校定正其脫誤則正字主之四朝志  
 建炎二年罷紹興中復又參酌舊制必召試學士院而後命  
 之中興會要

羣書要語云之與永涇渭難分營之與魚滄滄莫辨張鷟集注

云有人續史云三衣渡河子夏曰巳亥渡河校之果然又簡牘

磨滅以陶為陰以魚為魯辨門閨之非察陶陰之繆同上注云

左傳杜預據長曆此年無閏月當為門五日後人五土為合閏  
 遂以意定之刊魯照於往籍唐牛僧儒制亥豕有差魯照為弊

續通典長興三年校經籍敕是正文字之官實為儒學之選南

豐擬制瓊瑤玉佩父應接武於夔龍貝闕珠官尚困守關之虎  
 豹張子湖上陳正字啓

詩句城南晁正字國器無等雙黃山谷詔謂正字當居中楊誠

齋送蔡正字又應芸閣吏恐我僻兼愚劉得仁夜訪劉正字

古今事實 名播天下



唐蕭穎士天寶中為秘書正字。于是裴耀卿席豫張均宋遙常  
述皆先進器其才與鈞禮由是名播天下。唐書

海內文宗

陳子昂字伯玉初舉進士上書武后召見金華殿子昂貌柔野  
少威儀而占對慷慨擢蘭臺正字唐興文章承徐庾餘風天下  
祖尚子昂始變雅正初為感遇詩二十八章王適曰是必為海  
內文宗

通玄神童

吳通玄父道瓊為諸王太子授經通玄兄弟出入禁掖常侍太  
子遊通玄與兄通微俱博學善屬文文彩綺麗通玄幼應神童  
舉釋褐秘書正字

耀卿弱冠

裴耀卿少聰敏數歲解屬文應童子舉弱冠拜秘書正字。並唐書

明字未正

劉晏以神童為秘書省正字方年十歲慧晤過人上召入樓中  
貴妃置於膝上為施粉黛上問晏曰汝為正字正得幾字晏對  
曰餘字皆正惟明字未正。明皇雜錄

守道安恬

宋朝洪文公遵除正字閣下多前輩皆以畏友待公明年春文  
惠公繼來縉紳榮之秦熺為祕郎勢焰赫赫公守道安恬留滯  
不遷。周益公集

安恬靜默



范祖禹字淳父。司馬光碑同編修。資治通鑑書成。上章稱薦曰。臣誠不及也。由臣頑固。纂次淹久。致其沉淪。而祖禹安恬靜默。若將終身者。除祕書省正字。

不附荆公

范祖禹除正字。供職祕省時。王荆公當國。人皆奔競。公未嘗往謁。王安國與公友善。嘗論荆公意。以公獨不親附。故未進用。公竟不往見。言行錄

面試詩賦

晏元獻公殊。年十二。真宗面試詩賦。疑其宿構。明日再試。文采愈美。上大奇之。即除祕書省正字。令於龍圖閣讀書。司馬溫公實錄

文字生知

楊億字大年。以童子召對。試詩賦五篇。下筆立成。太宗歎異。以為祕書省正字。制曰。汝方髫髻。不煩師訓。精爽神助。文字生知。越景絕塵。一日千里。予有望於汝也。東都事略

對策見奇

廖正一。字明略。元祐中。蘇軾在翰苑。試館職。士得正一。對策奇之。除祕書省正字。同上

奏篇見稱

李壁撰周益公行狀。召試館職。奏篇上。高宗見稱其文。諭丞相曰。他日可令掌判正字。

召試免試

紹興已卯。諫官何溥請館職學官皆試。而後除人。以為憚久之。



王十朋始以太魁直除祕書郎不試未幾闕員寢多復召予與  
程大昌試止除正字其後無不試者至乾道元年黃石輪對稱  
旨擢祕書郎仍特免試自廷魁之外不試者惟石而已周益公集

待從合薦

陳師道字無已號後山居士少好詩一見豫章盡焚其藁而學  
焉元祐中侍從合薦于朝起為徐州教授改潁州紹聖中以進  
非科第罷尋召為祕書省正字著後山集十五卷

召試特命

韓駒字子蒼自布衣有詩名前輩稱許之政和初詣闕上書召  
試中書特命以官除祕書省正字言者論其進不繇科第請為  
筭軍

文有氣談

石悉字敏若政和初試中宏詞除館職四六之文有氣談而務  
奇恠為詩清逸有補林集十卷

文頗富贍

劉弇字偉明儒學決科擢館職文詞頗似石敏若而頗富贍不  
奇恠

古今文集

雜著

館閣送胡正字詩序

洪邁

前二年詔起胡先生於建安以司直廷尉先生辭曰臣憲老矣  
春秋七十有四居山林董董自足官于朝非壯有力而材者不



可臣老矣道不得奉詔天子攬其章換以中祕書官使無累職  
 事益自養先生不得辭句來來數月又請曰臣不能使老復少  
 今形容旅力又不逮在前時而陛下留臣無為也於是宰相言  
 胡憲半世為官進不能以寸願加寵秩之益廣聖世貴老貪賢  
 之義即日拜八品京官予祠祿使歸歸有日館閣之士八人舉  
 故事載酒餞祖之於國東門之外相屬賦詩番陽洪邁獨拱手  
 言曰先生之去美而之所以去則不可夫翹關負乘擊劍馳馬  
 加一日之老亦憊耳况過七十者乎至於雍容在廷標榜後進  
 坐乎安車蒲輪之上懼不能老而已而先生去之是使黃髮童  
 皤之士終不一朝居也且陛下擇官以處奉錢廩粟歲時諸恩  
 澤甚厚非所謂無入子思之側者滿朝賢大夫注意高仰無公

孫子側自事固之嫌儒生文士執弟子禮恐不得一解頰笑無  
 有驩駒狗曲之誚而先生居之若不釋然者往來屑屑不憚煩  
 於道路吾黨之士未有所聞於先生若之何同舍生暗曰疇昔  
 之歲先生且對延英以病告上書公車卓卓然五千言今皆略  
 施行其有補於朝廷多矣子之云云奈何邁竦然曰邁有罪酒  
 闌以往諸公詩且成邁醉不遑愧不暇詩獨序其所以然者紹  
 興三十一年二月四日序

律詩

簡孫正字

趙師秀

空齋兀兀難消日况入中年睡亦踈洗釜煮蔬留客飮捲簾移  
 菊看人鋤秋衣因病全無衲曉髮迎寒半脫梳多謝貴交芸閣



裏許令隨意借官書

除秘書省正字

陳后山

扶老趨嚴詔徐行及聖時端能幾字正敢恨十年遲益畏金根

綏寧辭温媪譏况來憂畏斷不盡鹿門期

王仲至

翠木陰陰白玉堂老來方此試文章官簷日永揮毫罷閑拂塵埃看畫墻

酬閻正字

李白

閻公漢庭舊沉鬱富才力價重銅龍樓聲高重門側



早稲田大学図書館

011488600143